

# Niadtong Adlaw Sa Kalbaryo

Jeffersonville, Indiana, USA

Septembre 25, 1960

1 Salamat kanimo, Brother Neville. [Si Brother Neville miingon, "Panalanginan ka, igsoon."—Ed.] Ang Dios magapanalangin kanimo, Brother Neville. Salamat kaayo kanimo. Maayong buntag, mga higala. Usa kini ka pribilehiyo nga makaanhi pag-usab dinhi sa Tabernaculo niining kabuntagon sa pag-alagad sa Ginoo diha sa paagi sa pagwali sa Pulong ug sa pag-ampo alang sa masakiton. Mapasalamaton kaayo ako niini nga adlaw.

Nahibulong ako sa dihang ako misulod. Usa ka igsoong lalake miduol kanako ug miingon, "Dili ako buot nga mahimong usa ka dili takus nga sanlahon nga naayo." Mao kadto si Brother Wright. Ako nag-ampo kaniya, ug ang Ginoo nag-ayo kaniya sa hingpit. Ug siya miduol nga naghilak aron sa paglamano sa akong kamot ug miingon nga—nga siya—buot nga magpasalamat sa Ginoo tungod—tungod kay giayo. Buot siya nga mobalik aron sa pagpasalamat. Nawala na gayud. Siya—siya maayo na sa hingpit karon. Mapasalamaton kita alang nianang mga pagtestimonyo.

2 Ug si Charlie, ikaw ug si Brother Jeffries, kung buot kamo, saka dinhi ug lingkori kining mga lingkoranan dinhi sa ibabaw. Ug labaw pa kamo nga giabi-abi, busa dili na kinahanglan nga kamo motindog. Ang laing brother dinhi, si Brother Wood, bag-o pa lang misaka dinhi, ug kamo—aniay pipila ka mga dapit dinhi sa lingkoranan, busa dili na kinahanglan nga motindog kamo. Ako nagtoo nga adunay pipila ka mga dapit dinhi. Ug... Kamo labaw pa nga giabi-abi sa pag-anhi ug mokuha niining mga dapit.

Malipayon kami nga... Ako nagtoo nga gisulti kini sa usa ka higayon, "Nalipay ako sa dihang sila misulti kanako... Ang Dios magapanalangin kanimo Brother. [Ang brother miingon, "Sa kanunay buot nga mahimong mahaduol ngadto sa magwawali."—Ed.] Salamat kanimo, salamat, salamat kanimo. Nalipay ako sa dihang sila misulti kanako, 'Moadto kita sa balay sa Ginoo.'" Mao kana ang Cristohanong pribilehiyo ug kalipay sa pag-adto sa balay sa Ginoo.

3 Sa pagtan-aw sa palibot ug nakita ang akong daghan kaayong mga higala niining kabuntagon, napuno ako sa kalipay tungod niini. Malipayon ako nga nakita si Brother ug Sister Dauch dinhi gikan sa Ohio. Akong nakita si Brother ug Sister Armstrong, sa luyo didto, gikan gayud sa Ohio. Ang Dios magapanalangin kaninyo usab. Ug oh, sa pagtan-aw gayud sa palibot kamo makakita ug daghan kaayo, medyo malisod sa paglitok sa tanan nilang mga ngalan. Sister Hoover, malipayon kami nga makakita kanimo niining kabuntagon nga gikan sa Kentucky. Ug si Charlie ug si Nellie, si Brother Jeffries ug ang iyang pamilya, ug daghan kaayo gayud nga gikan sa gawas sa syudad... Busa kita nagapanghinaut ug usa ka dakung panahon diha sa Ginoo niining kabuntagon. Nagapanghinaut nga ang Dios makitagbo kanato diha sa usa ka paagi sa pagpanalangin sa atong mga kalag ug magaalagad kanato sa mga butang nga atong gikinahanglan.

4 Ug samtang akong gilantaw ang dapit, kung ako moadto sa paghingalan sa tanan sa akong mga higala sa palibot dinhi, halos mahurot ang buntag sa pagsulti sa nagkalainlaing mga ngalan. Nakapahimo kini kanako nga maayo ang pamati nga makabalik sa simbahan aron makita ang tanang katawhan sa sulod, aron makahimamat...

Unsa kahay mahitabo sa dihang kita moadto sa langit, ug kita magtagbo didto alang nianang dakung panahon sa hangtud sa kahangturan, walay katapusang pagpakig-ambitay sa palibot sa trono sa Dios, ug ang mga panalangin nga gipangandoy natong tanan... Kita didto himoon nga mahisama Kaniya, ug diha sa Iyang dagway, ug uban sa Iyang Espiritu nga anaa kanato aron sa pagsimba ug pag-alagad Kaniya sa walay katapusan, nga dili gayud kapoyon.

Hunahunaa lamang; walay bisan unsang butang nga imong mahunahunaan, nga buot nimong buhaton, apan usahay ikaw kapoyon sa pagbuhat niini. Charlie, ako nagtoo ikaw ug ako nakapangayan ug squirrel labaw pa sa bisan unsang butang nga buot natong buhaton sa paagi niana, apan ikaw nahibalo ikaw kapoyon sa pagbuhat niini. Ug buot ako—ako nga mobaktas, motungas ngadto sa mga kabukiran ug mobaktas gayud, apan ako kapoyon usahay ug mobuhat ug laing ubang butang. Ug buot ako nga magdrayb.

Usahay ako medyo bation ug kakapoy, ug maluya, ug manerbyos; moambak lamang ako pasulod sa akong sakyanan, ug mopadagan, ug mogunit sa manebela ug moawit, "I'm so glad that I can say I'm one of them," kon ubang butang, nagakupot lamang nianang manebela ug magaawit ug magtindagtindag sa akong tiil ug mosinggat. Ug buyno ako... Taudtaud ako kapoyon, ug unya ako mobalik sa pinuy-anan ug mosugod sa laing butang pa. Apan sa dihang kita mosimba sa Dios nianang bag-ong Ginghamarian, wala na gayuy gutlo sa kakapoy... Kita sa kanunay mahimong panalangin sa padayon ug padayon. Apan sa pagkatinuod kita mausab unya; dili kita mahisama sama nga kita karon. Kita—kita malahi—malahi nga mga binuhat kay sa kita karon niining panahona. Busa kita malipayon.

5 Naghunahuna lamang ako. Wala ako nahibalo nga akong nahisgutan gayud kini kon wala. Si Brother Charlie... Sa usa ka higayon nga milabay ako didto sa ubos sa Kentucky kauban niya, ug siya miingon,

“Brother Branham, nagtoo ka ba nga sa Milenyum ikaw ug ako makapangayam pa ug squirrel?”

Ako miingon, “Wala ako nagtoo, Charlie.”

Siya miingon, “Oo, nakagusto kaayo kita niini,” miingon, “nagtoo ka—ka ba nga kita makahimo sa dihang kita makaadto sa milenyum?”

Ako miingon, “Dili, walay pagapatyon sa milenyum.”

Ug siya miingon, “Oo, makagusto gayud kita niini.”

Ako miingon, “Charlie, unsa kaha kung ikaw akong mahaylo nga ikaw sa usa ka higayon usa ka baboy, ug ikaw gituboy ngadto sa usa ka hataas nga linalang, ngadto sa usa ka tawo. Buot ba ikaw nga moadto—mobalik ngadto sa pagkababoy ug magpahimulos sa mga kalipay ingon nga usa ka baboy?”

Miingon, “Dili.”

Ako miingon, “Nakita nimo, ikaw mas habog pa kay sa baboy karon, ikaw usa ka tawo, dili na gayud ikaw buot nga mahimong baboy gayud.” Ako miingon, “Karon, pilopiloa kana sa napulo ka libo, ug mao kana ikaw sa dihang ikaw mausab gikan dinhi ngadto sa mahimong ikaw unya. Dili na gayud ikaw buot nga mahimong tawo pag-usab.” Tinuod kana. Mahimong usa ka butang nga lahi unya. Malipayon kaayo ako sa paghunahuna gayud niini, sa nahibalo nga sa umalabot nga adlaw kita mosaka paitaas.

6 Buyno, karon kung itugot sa Ginoo, sa sunod Dominggo nga mahimong... Unya ako mobiya aron sa pag-adto sa Wyoming uban sa usa ka maayong higala, kon ngadto sa Idaho uban sa usa sa akong maayong higala, si Brother Arganbright, si Brother Clayton Sonmore, ang Christian Business Men.

Sunod semana, ang semana human sa sunod semana mao karon ang ikapito; kinahanglan atua ako sa—sa Dallas, Texas, sa Voice of Healing Convention, ug ang akong gabii sa pagpamulong mao ang ikapito. Ug unya ako mobalik ngadto sa Idaho kauban si Brother Arganbright ug ang Christian Business Men, ug tingali adunay usa ka gabii sa Minneapolis sa dili pa kami mobiya, ug unya usa ka pamahaw sa Christian Business Men.

Kung itugot sa Ginoo, sa sunod Dominggo sa buntag, buot ako nga mahibalik dinhi sa tabernaculo pag-usab; ug kung kana pagatugotan ug mahimong kabubut-on sa Ginoo, ug buot ako mamulong sa usa ka butang hilisgutan nga “Alimpulos sa Hangin”; kung itugot sa Ginoo.

7 Kini daw anaa sa akong kasingkasing sa tibook semana; ug sunod buntag, sayo kaayo mga alas kuatro sa buntag, nakamata ako ug miabut kanako kining panghunahuna: “Niadtong Adlaw sa Kalbaryo.”

Ug karon, alang niining pagbasa paklion nato karon ang atong mga Biblia, diha sa Kasulatan sa Maayong Balita ni San Mateo sa ika-27 nga capitulo, ug magsugod sa ika-27 nga verseculo ug basahon ang bahin niining Kasulatan aron sa pagkuha sa atong background. Ug unya magsugod kita dayon, ug human sa pagwali, kita adunay pag-ampo sa masakiton.

8 Ug tanan sukad sa katapusang higayon dinhi, sa pagdala lamang pagbalik sa sulondan sa bag-ong matang sa akong ministry, ako adunay dugang nadala pagbalik nga mga testimonyo gikan nianang panagkatigum kay sa akong nabatonan sa bisan asa sa dugayng panahon. Adunay usa ka butang nga kinahanglan imong makontak ang tawo sa walay pagtagad kung unsa kadaku ang supernatural nga makita. Apan, nakita ninyo, ang kaayohan kinahanglan mapahiluna diha sa pagtoo sa usa ka tawo.

Karon, kung ang tawo adunay pagtoo, ug ilang makita sama nga ang Espiritu Santo nga moadto sa mga tigpaminaw ug moingon, adunay—adunay mga butang nga mahitabo: ug nga “Ikaw mao kini ug mao kana ang ngalan, ug ikaw gikan sa usa ka dapit, ug usa ka butang ang imong nabuhat, ug mao kini nga paagi,” ug makita ang tanan niini nga nahitabo niana gayud nga paagi, bisan pa niana ang tawo nga nagalingkod didto motan-aw ug moingon, “Mao kana ang Dios. Akong gidawat ang akong kaayohan.” Apan inay niana kanang tawo moingon, “Pandongi ako sa mga kamot ug pag-ampo kanako: aron ako mamaayo.”

9 Apan mao kana ang paagi nga kita gitudloan dinhi sa America—ug aron sa pagtoo niana, ug mao kana sa pagkatinuod ang sumala sa Kasulatan. Apan karon atong makaplagaan sa Africa ug sa nagkalainlaing mga dapit, nga tugotan lamang ang usa ka butang nga sama niana nga mahitabo, ang tibook tigpaminaw makakab-ot gayud sa usa ka higayon, modawat sa ilang kaayohan, tungod kay wala sila gitudloan. Ug sa dihang ilang makita kana, sila nahibalo nga adunay usa ka Dios nga buhi; ug kung Siya buhi, Siya labaw sa tanan ug Siya—Siya magaayo, ug mao kana. Tungod kay ang basihan nagpahiluna na sa mga patukoranan nga Siya mao ang Mananambal ug magaayo sa katawhan. Unya sa dihang ilang makita ang Iyang Presensya nga nagapamuhat pinaagi sa Iyang iglesia, unya sila moingon, “Mao na kana. Mao kanang tanan ang among gikinahanglan.” Apan kita gitudloan sa pagpandong sa mga kamot sa masakiton ug mga butang sama niana. Mao kana ang hinungdan kini dili kaayo magsilbi ug maayo sa America.

Karon, hinumdomi, sa sunod Domingo sa buntag, itugot sa Ginoo... Si Brother Neville magpahibalo niini, sa pagkatinuod, kung kini... Ang—Usa ka Alimpulos diha sa Hangin.

10 Karon, gihatagan ko kamo ug diyutayng panahon aron sa pagpakli sa inyong Mga Kasulatan ngadto sa Mateo 27. Magasugod kita sa pagbasa sa—sa ika-27 nga verseculo sa—sa Maayong Balita ni San Mateo. Karon, maminaw kita ug maayo ngadto sa pagbasa.

Ug si Jesus gidala sa mga sundalo sa gobernador ngadto sa palasyo, ug sa iyang atubangan ilang gipundok ang tibook bando sa kasundalohan.

Ug sa nahuboan na siya nila, ilang gisul-oban siyag kupo nga mapula,

Ug sa nakalukong silag purongpurong nga sampinit, kini ilang gipahaum diha sa iyang ulo, ug ila siyang gipakupot ug baston nga bagakay sa iyang toong kamot, ug sa nagluhodluhod sila sa iyang atubangan sa pagbugalbugal kaniya, sila nagkanayon, "Mabuhi ang Hari sa mga Judio!"

Ug ilang gipanaglud-an siya, ug unya ilang gikuha kaniya ang baston nga bagakay ug gihapak kini sa iyang ulo.

Tapus sa ilang pagbugalbugal kaniya, siya gihukasan nila sa kupo ug giuli pagsul-ob kaniya ang iyang kaugalingong mga sapot, ug unya ilang gidala siya aron ilang ilansang sa krus.

Ug sa pagpanggula nila sa siyudad, ilang hingsugatan ang usa ka tawo nga taga-Cirene, nga ginganlan si Simon; ug siya ilang gipugos sa pagpas-an sa krus ni Jesus..

Ug sa pag-abut nila sa usa ka dapit nga ginganlan ug Golgota (nga sa ato pa, dapit sa kalabera),

Si Jesus ilang gihatagan ug bino nga sinambugan ug apdo aron iyang imnon; apan sa natilawan niya kini, midumili siya sa pag-inom niini.

Ug sa gilansang na siya nila sa krus, ilang gibahinbahin ang iyang mga bisti tali kanila pinaagi sa ripa;

Ug unya nanglingkod sila aron sa pagbantay kaniya didto.

Ug sa ulobabaw kaniya, ilang gibutang ang sumbong batok kaniya, sinulat nga nag-ingon, "MAO KINI SI JESUS ANG HARI SA MGA JUDIO."

Ug dihay duha ka mga tulisan nga gilansang sa krus uban kaniya, usa sa iyang too ug usa sa iyang wala.

Ug siya gibiyabiay sa mga nanagpangagi nga nanagyangoyango sa ilang mga ulo

Ug nanag-ingon, "Ikaw nga maoy moguba sa templo ug mopatindog niini sa sulod sa tulo ka adlaw, luwasa ang imong kaugalingon! Anak ka man kaha sa Dios, kanaug sa krus."

Maingon man usab ang mga sacerdote nga punoan, uban sa mga escriba ug mga anciano, kaniya nagbugalbugal nga nanag-ingon,

"Kana siya nagluwas sa uban, apan sa iyang kaugalingon dili na hinoon makaluwas. Siya mao ang Hari sa Israel; pakanauga siya karon gikan sa krus, ug unya mosalig kita kaniya.

Nagasalig siya sa Dios; ipaluwas siya kaniya, kon may gusto man ang Dios kaniya; kay nag-ingon man tuod siya, 'Ako mao ang Anak sa Dios.'"

Ug ang mga tulisan nga gilansang sa krus uban kaniya nanamastamas usab kaniya sa samang paagi.

Ug sukad sa ikanapulog-duha ang takna sa kaudtohon, dihay kangitngit sa tibook kayutaan hangtud sa ikatulo ang takna sa hapon.

Ug sa may ikatulo na ang takna sa hapon, si Jesus mituwaw sa makusog nga tingog nga nag-ingon, "Eli, Eli, lama sabactani?" nga sa ato pa, "Dios ko, Dios ko, nganong gitalikdan mo ako."

Ug dihay nanagtindog sa duol nga sa pagkadungog nila niini miingon, "Nagtawag siya kang Elias."

Ug ang usa kanila midalagan dihadiha ug mikuhag espongha, gipatuhop kinig suka, ug gibutang kini sa tumoy sa usa ka bagakay ug gitunol kaniya aron iyang imnon.

Apan ang uban nanag-ingon, "Pasagdi lang; tan-awon ta kon moanhi ba si Elias aron sa pagluwas kaniya." [Ug dihay mikuhag bangkaw ug iyang gidughang ang kilid ni Jesus, ug dihay miagay nga tubig ug dugo.]

Ug si Jesus miusab pagtuwaw sa makusog nga tingog ug unya mitugyan sa iyang espiritu.

Ug tan-awa, ang tabil sa templo nagilis sa duha ka bahin, gikan sa itaas ngadto sa ubos, ug ang yuta mikurog, ug ang mga pangpang nangasip-ak;

Ug nangaabli usab ang mga lubong, ug namangon ang daghang mga lawas sa mga balaan nga nangamatay na,

Ug sa nakapanggula sila gikan sa mga lubong tapus sa iyang pagkabanhaw, nangadto sila sa siyudad nga balaan ug mipakita ngadto sa daghang mga tawo.

Ug sa diha nga ang kapitan ug ang iyang mga kauban nga nagbantay kang Jesus, nakakita sa linog ug sa mga butang nga nagkahitabo, sila nangahadlok pag-ayo ug miingon, "Sa pagkatinuod kini siya anak sa Dios!"

11 Magaduko kita sa atong mga ulo sa makadiyut alang sa pag-ampo. Ginoo, kami nahibalo nga Ikaw mao ang Dios, ug human sa pagbasa niining sagrado ug balaan nga Pulong, sa gihapon among nakita nga ang Imong kinaiya dili mausab. Dios Ikaw sa kanunay. Ug daw sama kini nga si Jesus walay bisan unsang tabang, nga Siya gisikop sa mga dautang kamot, ug gidughang, ug gilukaan, ug gibiyabiay, ug gibitay sa krus, nagkadugo, himalatyon; ug daw sama nga walay tabang sa bisan asa, bisan gani hangtud Siya mituaw sa Iyang kaugalingon, "Dios Ko, Dios Ko, nganong gibiyaan Mo Ako?" Apan Ikaw milihok diha nianang gutlo nga sa dihang walay bisan pa nga makalihok.

Gihatagan kami aron mahibalo, Ginoo, nga kung kami adunay bisan unsa nga mga sapa nga dili namo matabok, kung kami adunay mga bukid nga dili maagian, ang Dios batid sa pagbuhat ug mga butang nga ang uban dili makahimo. Ikaw batid sa pagbuhat. Kay Ikaw nahibalo sa hinungdan nianang adlaw sa Kalbaryo. Ikaw, ingon nga Dios, walay kinutoban, nahibalo nga kining taknaa kinahanglan moabut. Apan sa dihang kini natuman, unya Ikaw nagpakita nga Ikaw mao ang Dios. Imong gipakita kung kinsa ang Boss.

12 Imong gitay-og ang yuta, ug migula ang mga balaan nga nahikatulog sa yuta. Imong gipaitom ang adlaw diha sa kagabhion, ingon sa kangitngit sa kagabhion, nagpakita nga Ikaw Dios, apan daw sama nga Ikaw mihilom sa dugay kaayo. Sa katapusan tugoti kami nga makakutlo niini: maingon nga samtang kami maglakaw diha sa Espiritu, minandoan sa kamot sa Dios, sa walay pagtagad kung daw mahimong sayup, bisan pa niana kami magaatubang sa Kalbaryo, ang Dios mosulti diha sa tukmang takna diha sa tukmang panahon.

Karon, Amahang Dios, mangamuyo kami sa kapasayloanan sa among mga sala ug sa among mga paglapas. Kami nangamuyo sa Imong Espiritu nga magamando kanamo. Mandoi kami maingon sa pagmando sa Salampati sa Karnero. Tugoti kami nga mahimong magmatinumanon ngadto sa bisan unsang moabut kanamo, sa pagkahibalo niini, nga ang Dios magabuhat ug maayo sa tanang mga butang, ug nahibalo nga kini mahimong maayo man.

Ubani kami karon dinhi niining serbisyo. Nagaampo kami nga Ikaw magaluwas niadtong anaa sa kahimtang nga luwasonon ug nagapangita sa kaluwasan. Pun-a sa Kinabuhing Dayon kadtong nagapangita niini. Nagaampo kami nga Ikaw magayo niadtong masakiton ug ginasakit nga mianhi aron sa pagpangita sa kaayohan. Ug kami nagadayeg Kanimo alang niini. Gipangamuyo namo kini diha sa Ngalan sa Imong Anak, among Maluluwas nga si Jesu-Cristo. Amen.

13 Karon, sa pagpamulong niining kabuntagon, buot namong agdahon ang inyong pagtagad ngadto sa teksto nga akong gipili aron ipamulong gikan sa, "Niadtong Adlaw Sa Kalbaryo." Kini daw sama nga mahimong wala sa panahon. Kinahanglan himoon kini sa Byernes Santo. Ang Kalbaryo kinahanglan hinumdoman sa matag adlaw. Ug kita nakapatalinghug sa daghan kaayo mahitungod niini, nakabasa sa daghan kaayo mahitungod niini. Ang mga magwawali nagawali niini sukad sa pagsugod sa panahon. Ang mga mag-aawit nagaawit niini latas sa mga kapanahonan. Ang mga profeta nagatagna niini upat ka libo ka mga katuigan sa wala pa kini nahitabo, ug ang mga profeta niining panahona nagatudlo pagbalik ngadto kung diin kini nahitabo. Usa kini ka importante nga adlaw.

Usa kini sa labing importante nga mga adlaw nga ang Dios nagtugot gayud nga mobanagbanag sa yuta. Ug kung kini importante kaayo ngadto sa tawhanong kaliwat, ang Kalbaryo, ako nagtoo nga kini maayo alang kanato nga mobalik ug susihon ug tan-awon gayud unsay kahulogan niini alang kanato. Kay ako seguridad dinhi niining ulahi nga takna nga atong gikinabuhian, kita nagapangita sa matag kahinungdanon sa Dios nga atong mahibaloan; ug ang tanan nga atong mahimong makaplagnan, kita ania dinhi aron makakat-on niini: aron makita kung unsa ang alang kanato, ug unsa ang gibuhat sa Dios alang kanato, ug makita kung unsa ang Iyang gisaad nga buhaton alang kanato. Ug mao kana kung unsa ang atong gianhi sa simbahan.

14 Mao kana ngano ang magwawali nagawali. Mao kana ngano nga siya nagatuon ug nagapamalandong diha sa Kasulatan ug nagapangita sa dihang, tungod kay siya usa ka publiko nga sulogoon ngadto sa katawhan sa Dios, ug siya nagtinguha sa pagpangita sa usa ka butang nga—nga isulti sa Dios ngadto sa

Iyang katawhan, usa ka butang nga makatabang kanila. Tingali kini maghukom kanila sa ilang mga sala, apan mahimong tabang sa pagpabangon kanila; nga hinaut sila mobiya sa ilang mga sala ug unya mobangon aron sa pag-alagad sa Ginoo. Ug ang mga ministro kinahanglang magapangita niining mga butanga.

15 Kung kini nga adlaw ingon nga importante kaayo, usa sa mga labing daku nga mga adlaw, magatan-aw kita sa tulo ka nagkalainlaing mga butang nga ipasabut nianang adlaw kanato. Makahimo kita sa pagkuha ug mga gatasan. Apan niining kabuntagon nagapili lamang ako ug tulo ka nagkalainlaing mahinungdanong mga butang nga atong buot tan-awon alang sa sunod pipila ka mga gutlo, kanang ipasabut sa Kalbaryo kanato. Ug ako nagaampo nga kini magahukom sa matag makasasala nga ania karon, kini makahimo sa matag balaan nga moluhod, nga makahimo sa matag tawong masakiton nga mopausbaw sa iyang pagtoo ngadto sa Dios ug mobiya nga naayo, matag makasasala maluwas, matag backslider mobalik ug maulaw sa iyang kaugalingon, ug ang matag balaan magakalipay ug modawat sa bag-ong paghambin ug bag-ong paglaum.

16 Ang usa ka dakung importanting butang nga ipasabut sa Kalbaryo kanato ug sa kalibutan mao nga kini ang magsulbad sa suliran sa sala sa makausa alang sa tanan. Ang tawo nakaplagnan nga sad-an tungod sa sala, ug ang sala usa ka silot nga dili mabayaran sa tawo. Ang silot daku kaayo hangtud walay bisan kinsa nga makabayad sa silot. Sa tinuoray ako nagatoo nga ang Dios nagpahimutang niini niana nga paagi, nga ang silot mahimong daku kaayo nga walay tawo nga makahimo sa pagbayad niini, aron Siya makahimo niini sa Iyang kaugalingon.

Karon, ang silot sa sala mao ang kamatayon. Ug kitang tanan natawo diha sa sala, naumol diha sa kasal-anan, mitungha sa kalibutan nga nagapamulong ug mga bakak. Tungod niana, walay usa kanato nga takus, kon dili sila makakaplag ug usa diha sa yuta nga takus.

17 Ug ang sala wala nagsugod sa yuta. Ang sala nagsugod sa langit. Si Lucir—Lucifer, ang yawa, usa ka hinukman nga linalang tungod sa iyang pagkamasukihon sa wala pa gayud siya nahulog sa yuta. Ang sala nagsugod sa langit, diin ang Dios nagbutang sa mga manolunda ug uban pa ibabaw sa mao ra nga basihanan nga Iyang gibutang sa mga tawo. Ang kahibalo, ang kahoy sa kahibalo... Ang kahoy sa Kinabuhi, ug ang kahoy sa kahibalo, diin ang tawo makahimo sa iyang pagpili. Ug sa dihang si Lucifer gihatagan nga mahimong labaw aron makahimo sa iyang pagpili, buot siya nga makabaton ug usa ka butang nga mas maayo pa kay sa iya sa Dios. Mao kana ang pagsugod sa kagubot.

18 Ug adunay panilngon alang sa sala. Ang isingil mao ang kamatayon. Ang kamatayon mao ang silot, ug mao kana ang... Makahimo kita sa pag-adto sa mga dagkung mga detalye mahitungod niini, tungod kay ako dili motoo nga aduna pay lain gawas sa usa ka kamatayon. Adunay usa ka kinabuhi. Ug ako nagatoo nga ang tawo nga adunay Kinabuhing Dayon dili gayud mamatay, ug ako nagatoo nga adunay hingpit nga pagkawagtang nianang kalag nga makasala, kay ang Biblia miingon, "Ang kalag nga makasala, kini sa pagkamatuod mamatay," dili ang tawo, ang kalag nga makasala. Busa si Satanas sa pagkamatuod kinahanglan mamatay aron hingpit nga malaglag.

Dili ako mouyon sa universalist nga moingon nga si Satanas maluwas. Nakasala siya, ug siya mao ang sinugdanan sa sala. Ug ang iyang kalag nakasala ug siya usa ka espiritu. Kanang espiritu kinahanglan sa hingpit mawagtang aron walay mahibilin niini.

19 Ug sa diha nga ang sala miabut sa yuta balik sa sinugdan sama sa usa ka taklap sa kangitngit nga nahulog gikan sa langit, kini nakaparalisado sa yuta. Kini nagbalhug sa tanang binuhat sa yuta, ug sa tanang kabuhatan sa Dios, ngadto sa pagkaulipon. Ang tawo nailalum ngadto sa pagkaulipon sa kamatayon, mga balatian, mga kagubot, mga kagul-anan. Ang tanang kinaiyahan nahulog uban niini. Ang sala mao ang igpakatulog nga sa pagkatinuod nakaparalisado sa yuta. Ug unya kita nahimutang dinhi nga walay paglaum, tungod kay ang tanang binuhat sa yuta nailalum niini, ug ang matag-usa nga natawo sa yuta nailalum niini. Busa nagkinahanglan kini nga moabut gikan sa ubang dapit nga diin walay sala. Dili kini mahimong gikan sa yuta.

Ang usa kanato dili makaluwas sa lain. Kinahanglan kini nga gikan sa lain. Tungod niana, sa dihang ang tawo nakaamgo nga siya nahimulag gikan sa Dios, siya nahimong ug ka lumalangyaw. Sila mihilak; sila mituaw; sila naghago; sila milangyaw latas sa mga kabukiran ug latas sa mga kamingawan nagapangita ug usa ka siyudad kansang Magtutukod ug Magbubuhay mao ang Dios. Kay siya nasayud nga kung siya makabalik gayud diha sa Presensya sa Dios, siya makasulti niini ngadto Kaniya. Apan walay paagi sa pagbalik. Siya nawala. Wala siya nahibalo kung asa moliso, busa siya gayud milakaw nga nasaag, nagtinguha nga makaplag ug usa ka dapit aron makakita ug dalan pabalik ngadto nianang dapita. Usa ka butang sa sulod niya nga nagsulti kaniya nga siya gikan sa—sa usa ka dapit nga hingpit.

20 Walay usa ka tawo dinhi niining makita nga mga tigpaminaw niining kabuntagon, kon sa tigpaminaw sa teyp, diin kini moadto palibot sa kalibutan; walay usa dinhi kon sa bisan asa nga dapit, apan kadtong nagapangita nianang pagkahingpit. Makabayad ka sa imong mga balayronon; nagtoo ka nga natapus na kini. Sa dihang nahuman na nimo ug bayad ang imong mga balayronon, unya adunay usa ka tawo sa

imong pamilya nga nagsakit. Sa dihang maayo na ang mga sakit, unya adunay dugang mga balayronon nga pagabayran. Ang nahaunang butang nga imong mahibaloan ang imong buhok nahimong ubanon, ug unya buot ikaw nga mobalik ngadto sa pagkabatan-on. Ug adunay usa ka butang sa tanang panahon, sa kanunay, tungod nianang balud sa sala. Apan diha sa imong kasingkasing, tungod kay ikaw nagapangita niana, nagpakita kini nga adunay pagkahingpit sa usa ka dapit. Sa usa ka dapit adunay usa ka butang.

21 Mao kana ang hinungdan sa daghang panahon karong panahona nga ang usa ka makasasala sa gihapon nahisalaag. Ang matahum nga babaye moputol sa pongpong sa iyang buhok aron mahimong mabantog, magpintura sa iyang nawong aron mahimo siyang maanyag, magsuot ug bisti nga magpakita sa porma sa iyang pagkatawo, tungod kay mao lamang kini ang butang nga iyang makita, makaplagnan sa usa ka dapit, sa pagtingha nga makakaplag ug usa ka butang nga mobalik ngadto kaniya; sa dihang siya makahimo sa mga lalake sa pagtaghoy kaniya, warawara kaniya, mobirigbirig kaniya. Ang mga batan-ong mga lalake magabuhay ug mao gihapon nga butang ngadto sa babaye: nagtinguha sa iyang kaugalingon nga mahimong madanihon ngadto kaniya. Ang mga silingan magatukod ug balay nga mas maayo pa kay sa dapit sa iyang silingan. Mao kini sa tanang panahon. Nagapakita kita sa usa ka butang, ug usa ka butang nga nagapadayon ug diyutay lamang sa ibabaw niini.

22 Ang batan-ong ginang makakaplag nga adunay laing batan-ong ginang nga mas inila pa kay kaniya. Ang silingan makakaplag nga adunay usa ka balay nga mas maayo pa kay kaniya. Ang babaye makakaplag sa laing babaye nga nagasuot sa laing paagi nga mas maayo nga tan-awon kay sa iyang gibuhay. Usa kini ka butang sa sulod nato nga nagapangita ug usa ka butang, ug nagpakita kini nga kita nahisalaag. Buot kita nga makakaplag nianang usa ka butang nga magadala kanato ngadto nianang pagkatagbaw, nga makapuno nianang kagutom nga anaa sa sulod didto, apan murag kita dili makakaplag niini.

Ang mga tawo naningkamot niini latas sa mga kapanahonan. Mihilak sila niini. Sila mituaw. Ilang gihimo ang tanang butang nga ilang nahibaloan nga buhaton, apan sa gihapon sila dili makakaplag niini, naglaaglaag palibot sa kalibutan.

23 Sa katapusan usa niana ka adlaw, mao kana ang adlaw didto sa Kalbaryo, adunay mikanaug gikan sa himaya, pinaagi sa Ngalan ni Jesu-Cristo, ang Anak sa Dios Kinsa gikan sa himaya, ug ang Kalbaryo naporma. Mao kana ang adlaw nga ang bili gibayaran, ug ang suliran sa sala nahusay hangtud sa kahangturan, ug kini miabli sa dalan ngadto niining butang nga kita gigutom ug giuhaw. Nagdala kini sa usa ka dapit sa pagkatagbaw.

Walay usa ka tawo nga nakaadto gayud sa Kalbaryo ug nakita kini sa paagi nga mao kini kaniadto, nga nahimong mao sa gihapon gayud. Ang tanang butang nga iyang gipangandoy kon gidahom natagbo sa dihang siya nakaabut nianang dapit. Usa kini ka importanting butang, ug usa ka mahinungdanong butang, kini mitay-og sa kalibutan. Mitay-og kini sa kalibutan nga kini wala gayud matay-og sa wala pa namatay si Jesus didto sa Kalbaryo ug mibayad sa suliran sa sala.

24 Kining makasasala nga kalibutan adunay kangitngit. Ang adlaw misalop sa udtong tutok; kini adunay nerbyosong pagkaluya. Ang mga pangpang nangatay-og, ang mga bukid napagan, ug ang mga patayng lawas mibutho gikan sa lubnganan. Unsay gibuhay niini? Ang Dios miataki didto sa Kalbaryo. Iyang gisamaran kanang mananap nga gitawag ug Satanas hangtud sa kahangturan.

Karon, siya nahimong labing dautan sukad kaniadto, tungod kay kini nagdala ug Kahayag ngadto sa tawhanong kaliwat; ug si bisan kinsa nahibalo nga ang usa ka mananap mao ang labing dautan, nagakamang sa palibot uban sa iyang likod nga nadugmok.

Karon, si Satanas napukan didto sa Kalbaryo. Ang yuta nagpamatuod nga mao kadto. Ang labing dakung bili nga gibayad gayud, ug ang makahimo sa pagbayad niini, miabut ug nagbuhay niini sa Kalbaryo. Mao kana kung diin ang dakung bili gibayaran. Mao kana ang usa sa mga butang.

25 Ang Dios nagkinahanglan niini. Walay tawo nga takus. Walay tawo nga makahimo. Walay tawo nga makabuhay niini. Ug ang Dios mitungha sa Iyang kaugalingon, ug nagkinabuhi sa tawhanong kinabuhi ilalum sa mga tawhanong mga tinguha ug gilansang sa Kalbaryo ug didto, sa dihang si Satanas nagtoo nga dili Niya buhaton kini, dili Siya moadto pinaagi niini... Siya miadto sa Getsemane, ug ang matag tentasyon nga gibarugan gayud sa bisan kinsang tawo, Siya miagi niini sama lamang sa tanang tawo; apan Iyang gibayaran ang bili; mao kana ang nakapangitngit sa yuta sama sa igpakatulog alang sa operasyon.

Sa dihang ang doktor magahatag sa tawo ug igpakatulog, tumbahon usa niya siya sa dili pa siya makahimo sa pagbuhay niini. Ug sa dihang ang Dios naghimo sa—sa operasyon sa iglesia, ang kalibutan nakakuha ug igpakatulog. Ang kinaiyahan gibidbid.

Dili ikatingala, ang Dios diha sa tawhanong unod himalatyon. Mao kadto ang takna nga ginapaabut sa kalibutan, bisan pa man daghan kanila ang wala nahibalo niini. Sama kini karong panahona, daghan ang

nagapangita niining mga butanga ug bisan pa sila wala makaila kanila. Wala sila makaamgo sa agianan pagawas. Sila sa gihapon nagtinguha sa pagpangita sa mga kalipayan ug mga butang sa kalibutan, nagtinguha nga makakaplag sa ilang agianan sa paggula.

26 Adunay daghang mga tultulanan nga nagpunting ngadto nianang adlaw, daghang mga dagkung landong daan. Kini gilandong daan pinaagi sa karnero, pinaagi sa vaca, pinaagi sa tokmo, ug sa tanan niining mga butang; apan bisan pa niini dili kini makabungkag niini. Dili kini makabungkag nianang kota sa kamatayon. Kay si Satanans adunay yuta, ang mga bato nga siya sa makausa nagalakaw pasaka ug kanaug sa yuta, ang nagdilaab nga azufre. Si Lucifer mao ang anak sa kabuntagon, ug siya nagalakaw sa yuta sa dihang kini usa ka nagdilaab nga bolkan. Kadtong mao gihapon nga mga bato nga wala nay kainit, sa dihang si Jesus namatay sa Kalbaryo, gibuga gikan sa yuta. Ang bili nga gibayran, ug ang pag-ulipon ni Satanans gibungkag.

27 Ang Dios nagbutang pagbalik ngadto sa mga kamot sa tawo sa agianan balik ngadto sa iyang ginapangita. Siya dili na kinahanglan maghilak gayud. Bisan pa niana, sa dihang Iyang gibuak ang dugokan ni Satanans didto sa Kalbaryo, ang dugokan sa sala, sa balatian... Ug kini nagdala sa tanang tawo sa yuta balik ngadto sa Presensya sa Dios uban sa mga sala nga gipasaylo.

Hallelujah. Ang atong mga sala gipasaylo. Dili na gayud makababag si Satanans kanato ngadto sa Dios. Adunay halapad nga dalan nga gihimo. Adunay telepono nga gibutang didto. Adunay linya paingon sa himaya. Makahimo kini sa tanang tawo nga makakab-ot nianang linya.

Kung ang usa ka tawo napuno sa sala, magadugtong kini kaniya diha sa "karaang sentral." Mahimong mapasaylo siya nianang sala. Dili lang niana, apan kanang sala gibayaran na. Himaya. Dili ka na kinahanglan nga mosulti ug, "Dili ako takus." Sa pagkatinuod ikaw dili. Dili ka gayud mahimo. Apan adunay takus nga mikuha sa imong dapit. Gawasnon ka na. Dili kana maglaaglaag gayud. Dili kana mahimong usa ka tawong nagapangita ug kalingawan dinhi sa yuta. Kay,

There is a fountain filled with blood,  
 Drawn from Emmanuel's veins;  
 Where sinners plunged beneath the blood ,  
 Lose all their guilty stains.

Dili na kinahanglan nga masaag ka; adunay dakung dalan ug agianan, ug gitawag kini nga dalan sa pagkabalaan. Ang mahugaw dili makaagi niini, kay siya moagi sa tuburan pag-una; unya siya moagi sa dakung dalan.

28 Iyang gibungkag ang mga gahum ni Satanans. Iyang giablihan ang mga pultahan sa prisohan sa hades. Ngadto sa tanang tawo nga gisirad-an diha sa mga prisohan dinhi sa yuta, nga nahadlok sa dihang siya namatay, kung unsa ang himoon sa kamatayon ngadto kaniya; didto sa Kalbaryo Iyang giablihan ang mga pultahan sa mga prisohan, ug gipagawas ang tanang binilanggo. Dili na kinahanglan nga kuniskunison ka sa sala. Dili na kinahanglan nga imong itugyan ang mga bahin sa imong lawas ngadto sa sala: pag-inom, pagsigarilyo, pagsugal, pagsulti ug mga bakak.

Mahimo kang matinud-anon, matarung, ug matul-id; ug si Satanans dili makahimo ug bisan unsang butang mahitungod niini; tungod kay ikaw nakakupot sa linya, sa linya sa kinabuhi. Nakaangla kini sa Bato sa Kapanohan. Walay bisan unsang butang nga makatay-og kanimo gikan niini. Walay mga hangin nga makahimo sa pagtay-og kanimo gikan niini. Walay bisan unsang butang, bisan pa ang kamatayon sa iyang kaugalingon nga makabulag kanato gikan sa gugma sa Dios nga anaa diha kang Cristo Jesus.

29 Mao kana ang buot ipasabut sa Kalbaryo. Mga tawo nga anaa sa pagkaulipon gihatagan ug kagawasan. Mga tawo nga sa makausa nailalum sa kahadlok sa kamatayon dili na gayud mahadlok sa kamatayon. Ang usa ka tawo nga nagapangandoy sa usa siyudad kansang Magtutukod ug Magbubuhat mao ang Dios, siya makahimo sa pagtikang ngadto sa dakung dalan ug iyang ihangad ang iyang ulo paingon sa langit, tungod kay siya gawasnon na. Hallelujah. Siya gitubos na. Dili na siya kinahanglan nga masaag pa gayud, kay adunay usa ka dalan sa pagkahibalo kung ikaw sayup ba kon dili. Ang Dios naghatag kanato sa Kinabuhi. Ang atong mga sala wala na. Nianang adlaw sa Kalbaryo ang bili gibayran. Sa dihang atong makita kanang tanan, dili ikatingala ang magbabalak misulat,

Taliwala sa mga nasip-ak nga mga bato  
 ug mangitngit nga mga kalangitan,  
 Ang akong Manluluwas miduko sa Iyang ulo, ug namatay.  
 Ang nabukas nga tabil nagpadayag sa dalan,

Ngadto sa mga kalipay sa langit ug walay katapusang adlaw.

30 Si Abraham dili na maglangyaw gayud latas sa nasod sa pagpangita sa siyudad. Ang makasasala dili masaag gayud kung siya ba naluwas kon dili. Ang tawong masakiton dili na mgaduhaduha kon siya ba naayo kon wala. Ang nabukas nga tabil niadtong adlaw sa kalbaryo nagpadayag sa dalan ngadto sa hingpit nga kadaugan. Ang Dios nagahatag kanato sa mga gahum sa Iyang Espiritu sa pagkinabuhi nga madaugon ibabaw sa niining tanang mga butang; nag-awhag lamang kanato nga motoo niini. Nahitabo kana niadtong adlaw sa Kalbaryo.

Wala gayuy usa ka adlaw nga sama niana. Wala na gayuy usa nga mahimong sama niana. Dili na kinahanglanon gayud kana. Ang bili gibayran na, ug kita gitubos na. Salamat sa Dios; kita gitubos na.

Walay paagi nga ikaw mahisalaag; wala gayuy pagpanaghap pa mahitungod niini. Kining tanan gikuha na. Ang tabil gikuha ug kita nahimutang sa dakung dalan, dili mahisalaag pa gayud, apan sa pagtoo ug mopadayon lamang sa paglakaw. Kita magalakaw gayud ngadto sa labing Presensya sa Dios.

31 Si Abraham nasayud, ug ang uban nasayud nga samtang sila nagapangita sa siyudad, sila nasayud nga sila gikan sa usa ka dapit. Usa ka butang ang nahitabo. Sila nagkinabuhi diha sa usa ka paralisado nga yuta. Ang mga linog miabut; ang mga bagyo miabut, mga gubat ug mga pagpatay. Ang lobo ug ang karnero nagakaon ang usa ngadto sa usa, kon ang lobo nagakaon sa karnero, ug ang leon nagakaon sa vaca. Dili kini maayo. Adunay usa ka butang nga sayup. Ang tawo, ug ang igsoon nagapatay ug igsoon. Ang amahan nagapatay sa anak; anak nagapatay ug amahan. Adunay usa ka butang nga sayup. Siya nagkatigulang. Siya nagapaingon sa kamatayon. Siya nagakalaya. Ang balatian anaa kaniya. Siya anaa sa pagkaulipon. Ang mga kahoy nagatubo apan dili molungtad; sila mamatay. Ang mga kabukiran mausab. Ang mga dagat mauga. Ang mga tubig mahubas. Adunay usa ka butang nga sayup, ug siya nagapangita ug usa ka dapit, usa ka siyudad nga diin kana dili na mahitabo gayud; Siya nahibalo kung siya makabalik gayud ngadto sa Presensya nga naghimo niana nga maayo, siya makahimo sa pagsulti niini ngadto Kaniya.

32 Oh, unsa ka pribilehiyo, makasasala, mao kini ang kabuntagon nga imong nahibaloan nga ikaw nakabaton ug dalan karon. Nianang adlaw sa Kalbaryo giablihan ang dalan. Kay ang tanang mga patriarka nga nagapakita ug nagapangandoy niini, ang Kalbaryo nagahatag niini kanimo nga walay bayad. Unsaon nimo niini sa pagsalikway? Unsaon nimo sa pagsalikway niini ug magpasakop sa usa ka denominasyon? Unsaon nimo sa pagsalikway niini aron sa pagpuli sa usa ka butang alang niini, sa mga kalipayan sa kalibutan. Nganong dili dawaton kini?

Ang nabukas nga tabil magadala sa usa ka tawo balik gayud ngadto sa Presensya sa Dios nga walay sala diha kaniya sa bisan unsang matang, ug nagbutang kaniya sa usa ka dalan sa iyang atubangan ngadto sa butang nga iyang ginapangita: langit, himaya, kalinaw, Kinabuhing Dayon, tanang butang diha gayud sa iyang atubangan.

33 Kanang adlaw mao ang—ang hapak sa kamatayon ngadto sa gahum ni Satanas. Nagtapus kini sa tanang butang. Ug akong makita Siya didto. Siya mao ang Cordero sa Eden gikan sa pinakaunang landong nga miabut gikan Niini, sa dihang si Abel pinaagi sa pagtoo naghalad ngadto sa Dios ug labing maayo nga halad kay kang Cain.

Tingali iyang gihiktan ug balagon sa parras ang liog sa karnero, giguyod ug gibutang siya ibabaw sa bato, nagkuha ug usa ka bato nga gihimong kutsilyo, ug gibaliko ang liog paingon sa likod, ug gitigbas ug gidunggab siya hangtud namatay siya ug ang iyang balahibo naligo sa iyang kaugalingong dugo. Naglunang siya sa iyang dugo.

Usa kini ka landong. Apan niadtong adlaw sa Kalbaryo, walay usa ka Cordero sa yuta, apan mao kadto ang Cordero sa Dios nga himalasyon, naglunang sa Iyang kaugalingong Dugo. Siya gitigbas ug gidunggab ug gibunalan ug gilukaan ug gihapak ug gisagpa ug gibuhatan ug tanang butang sa kalibutan, ug ang Dugo nagatulo gikan sa mga pongpong sa iyang...

34 Sa dihang ang karnero ni Abel namatay, kini namatay nga nagsulti sa pinulongan nga dili masabtan ni Abel. Kini nagbahih. Ug sa dihang ang Cordero sa Dios namatay, niadtong adlaw sa Kalbaryo, Siya namulong sa usa ka pinulongan nga walay nakasabut Kaniya, "Dios Ko, Dios Ko, nganong gibiyaaan Mo Ako." Mao kadto ang Cordero sa Dios, nga gitagodtagod, gitigbas.

Siya ang maong Cordero nga anaa sa hunahuna ni Abel sa dihang iyang nakita ang gisaad nga kaliwat sa babaye. Siya mao ang Cordero nga nakita ni Daniel nga sa walay mga kamot gisapsap gikan sa bukid. Siya mao ang ligid sa taliwala sa ligid alang sa profeta. Ang tanan nga ilang nakita nang daan natuman niadtong adlaw, niadtong adlaw sa Kalbaryo. Mao kana ang nagpasulod sa dakung butang. Mao kana ang nagbali sa dugokan ni Satanas.

35 Nahauna, atong susihon unsay ipasabut nianang adlaw. Ikaduha, atong susihon unsay nabuhat nianang adlaw alang kanato. Karon, unsay nabuhat niini alang kanato... Karon, ikatulo, atong tan-awon



kung unsay angay natong buhaton alang nianang adlaw, unsay angay natong buhaton.

Nahauna, kinahanglan susihon nato kini, kay mao kini ang usa ka dakung adlaw, ang labing daku sa tanang mga adlaw. Ang bili sa sala gibayran. Ang gahum ni Satanas nabungkag. Ug karon, atong tanawon unsay kinahanglan buhaton nato agig balus.

Karon, agig balus, sa dihang si Jesus namatay didto sa Kalbaryo, sa Kalbaryo niadtong adlaw dili lamang Siya nagbayad sa bili sa atong mga sala, apan Siya usab nagbayad sa bili ug naghimo ug agianan nga kita makahimo sa pagsunod Kaniya. Kay kita, maingon nga ang pagkahulog ni Adam nga gitubos, maingon nga ang Espiritu nagmando kang Adam, ang nahaunang Adam, pinaagi sa Espiritu ug adunay pagbuot sa tanang kinaiyahan... Unya kita—ang ikaduhang Adam—kon ang tawo sa yuta gitubos ni Cristo gikan niadtong adlaw sa Kalbaryo, makahimo sa pagsunod Kaniya.

36 Karon, sa dihang Siya namatay sa Kalbaryo, Siya naghimo ug agianan. Iyang gitugyan ang Espiritu, ang Espiritu Santo nga nagpadala niini pagbalik ngadto sa yuta alang kanimo ug kanako aron atong ikinabuhi. Mao kana ang kahulogan sa Kalbaryo alang kanato.

Nahauna, susihon kini. Tan-awon kung unsay nabuhat niini alang kanato, ug karon unsay kinahanglan buhaton nato mahitungod niini. Unsay kinahanglan nimo ug nako mga buhaton? Karon, kita moingon, "Buyno, ako—ako nagpasalamat niana. Maayo kaayo kana." Apan kinahanglan dawaton nato kini. Ug sa pagdawat niini mao ang pagdawat sa Iyang Persona, si Cristo, diha sa atong kasingkasing. Unya kita gawasnon na gikan sa sala. Tungod niana, wala na gayuy mga talikala sa sala nga nagagapus kanato. Ang Dios... Sama lamang nga kita wala makasala gayud...

Ang hingpit nga halad gihimo sa hingpit alang kanato. Kay si Jesus miingon, "Busa magmahingpit kamo, ingon nga hingpit ang inyong Amahan nga langitnon." Unya wala na gayuy dugang buhaton pa, apan kita gihimong hingpit diha sa Presensya sa Dios.

37 Karon, anaa diha diin nawala kita sa ang atong dapit. Kung kita dili magbantay, kita magtinguha sa pagtan-aw pagbalik kung unsa kita kaniadto; ug samtang kita motan-aw pagbalik ngadto sa unsa kita, ang halad walay pulos kanato. Oh, dili ba kamo makakita, iglesia? Dili nako... Dili nako sulayan ang pagbuhat; dili ako makahimo, ug ni kamo dili makahimo. Walay kinahanglan nga sulayan pagbuhat. Ikaw nawala gikan sa pagsugod, samtang ikaw magatutok sa unsay imong gibuhat. Apan ayaw pagtan-aw ngadto sa imong gibuhat, tan-awa kung unsa ang gibuhat niadtong adlaw sa Kalbaryo alang kanimo.

Kini nagbayad sa imong sala. Kini nagtapus sa suliran. Ang imong mga sala mahimong sama sa pula, sila mahimong puti sama sa nyebe; mapula sama sa lutong pula, maputi sama sa balhibo sa karnero. Tungod niana ikaw wala nay sala. Ikaw sa hingpit wala nay sala. Bisan pa unsay imong nabuhat kon imong buhaton, ikaw sa gihapon walay sala. Maingon nga imong gidawat si Jesu-Cristo ingon nga imong Manluluwas, ang imong mga sala gipasaylo. Bisan unsang butang nga gipasaylo gipasaylo na ug gikalimtan.

Tungod niana unsay gibuhat niini? Nagahatag kini kanimo, human nianang kahimtang, sa Iyang Espiritu sa pagsunod Kaniya ug magbuhat sa Iyang gibuhat, alang sa uban nga nagapadayon sa pagsunod.

38 Siya usa lamang ka Tawo, ang hingpit nga Tawo. Iyang gihatag ang Iyang kinabuhi, ug Siya naghimo ug panag-ingnan alang kaninyo.

Karon, unsay kinahanglan nato nga buhaton. Karon, ang nahaunang butang nga buot nako isulti mao kini: si Jesus wala magkinabuhi sa Iyang kaugalingon. Ang Iyang Kinabuhi gihatag alang sa uban. Mao kana ang hingpit nga Kinabuhing Dayon. Sa dihang ikaw moingon nga moadto sa simbahan ug ikaw magbuhat ug maayong mga butang, maayo kana. Apan sa dihang ikaw magkinabuhi sa imong kinabuhi alang sa imong kaugalingon, wala kay Kinabuhing Dayon. Ang Kinabuhing Dayon mao ang pagkinabuhi alang sa uban.

Kini nagpamatuod nga sa dihang Siya mianhi diha sa Cordero sa Dios. Siya nagkinabuhi ug adunay Kinabuhing Dayon, tungod kay Siya wala nagkinabuhi sa Iyang kaugalingon. Siya nagkinabuhi alang sa uban. Ug ikaw midawat sa Kinabuhing Dayon pinaagi sa pagdawat nianang adlaw, ug wala na ikaw nagkinabuhi sa imong kaugalingon gayud. Ikaw nagkinabuhi alang sa uban.

39 Adunay miingon, "Giunsa nimo sa pagbarug ug tugotan ang bisan kinsa nga magtawag kanimo ug dautang mga ngalan?" Ikaw wala nagkinabuhi sa imong kaugalingon. Nagkinabuhi ikaw alang sa uban aron nga mahimo nimong matubos kanang tawo. Kamo nahimong mga anak. Ug ang nakaapan mahitungod niini mao nga ang iglesia nakalimot nga sila mga anak. Kamo mga anak. kamo mikuha sa dapit ni Cristo. Kamo mga anak; busa dili na kamo magkinabuhi alang sa inyong kaugalingon; magkinabuhi alang sa uban.

"Buyno, Brother Branham, ako makakinabuhi alang niining igsoon kay siya sa pagkatinuod usa ka maayong tawo." Dili mao kana. Pagkinabuhi alang nianang tawo nga nagdumot kanimo. Pagkinabuhi

nianang tawo nga mopatay kanimo kung ilang mahimo. Mao kana ang ilang gibuhat ngadto Kaniya. Ilang gipatay Siya. Ug Siya namatay aron nga Siya makaluwas kanila. Mao kana ang Kinabuhing Dayon. Sa dihang—anaa kana sa imong sabakan, ikaw moatubang sa langit unya. Apan ikaw nagsakripisyo sa imong kaugalingong butang, ihatag sila sama sa paghatag sa karnero sa iyang balhibo. Ikaw nagatutok paingon sa Kalbaryo.

40 Ako naglaum kini magatabang kanimo nga makaabut sa usa ka dapit... Mao kana kung unsa ang Tabernaculo, mao kana kung unsa ang kinahanglan buhaton sa tanang katawhan, mao ang pagpangita kung unsa ikaw ug unsa ang katuyoan.

Iglesia dili ang pag-adto sa simbahan aron lamang sa pagtugtog ug musika, moawit ug mga alawiton. Ang simbahan mao ang usa ka dapit diin ang pagtul-id... Ang paghukom magasugod sa balay sa Dios. Atong pagaisipon ang atong mga kaugalingon nga patay ug buhi ngadto kang Cristo. Unya Siya maghimo ug agianan nga kita makahimo sa paghalad sa atong kaugalingon ngadto sa Iyang serbisyo aron sa pagsunod Kaniya. Kung kita mosunod Kaniya, kita magalakaw sa kinabuhi nga Iyang gipangunahan. Kahibulongan kana. Si Jesus miingon, ug namulong mahitungod niini. Tugoti ako sa paghatag kaninyo sa pipila ka mga kutlo mahitungod niini. Paminaw ug maayo. Ayawg sipyata kini.

41 Si Jesus miingon nga nianang adlaw Iyang pagalainon ang katawhan sama sa mga karnero ug mga kanding, ug siya moingon ngadto sa mga kanding, "Tindog sa wala nga bahin," ug ngadto sa mga karnero, "Tindog sa too nga bahin." Ug Siya moingon ngadto sa mga kanding, "Pahalayo kamo Kanako, tungod kay ako gigutom ug wala ninyo Ako pakan-a. Ako nabilanggo, ug wala kamo managduaw Kanako. Ako hubo, ug wala ninyo Ako pabistih. Ako giuhaw, ug wala ninyo Ako paimna. Ako nagmasakiton, ug wala kamo mingduaw Kanako. Busa pahalayo kamo Kanako." Ug sa karnero, Siya moingon, "Ako gigutom ug Ako inyong gipakaon. Hubo ako ug gibistihan ninyo Ako. Nagmasakiton Ako ug giduaw Ako ninyo." Ug matikdi, ayawg sipyata nga makuha kini, iglesia. Ibutang kini sa inyong kasingkasing sa kahangturan. Gibuhat gayud kini sa walay pagpakahibalo. Ang katawhan wala magbuhat niini sa panahon sa katungdanan. Ang usa ka tawo nga magahatag kanimo ug usa ka butang kon ubang butang tungod kay angayng buhaton niya kini, ang usa ka tawo nga nagpakaon kanimo tungod kay angayng buhaton niya kini, siya adunay hinakog nga hunahuna. Kinahanglan nga mao kini ang imong pinaka-kinabuhi, ang imong pinaka-lihok.

42 Katingad-an kaayo ngadto niining mga karnero nga sila miingon, "Ginoo, anus-a nga Ikaw gigutom, ug kami wala nagpakaon Kanimo? Anus-a Ikaw gigutom, ug kami nagpakaon Kanimo? Anus-a Ikaw nga hubo, ug Ikaw among gibistihan? Anus-a Ikaw giuhaw, ug Ikaw among gipainom? Anus-a Ikaw nagmasakiton, ug Ikaw among giatiman?" Sa wala gayud hunahunaa kini, tungod sa gugma, mao kini gayud ang ilang kinabuhi nga nagkinabuhi diha sa sulod nila.

Dios, tugoti ang katawhan nga makakita sa unsay gibuhat sa Kalbaryo alang kanamo. Sa wala gayud hunahunaa, "Anus-a Ikaw, Ginoo. Wala gayud kami nahibalo niana."

Tan-awa giunsa ni Jesus sa paglingi ug miingon, "Sa pagkaagi nga inyong gibuhat ngadto niining mga labing gagmay, inyong gibuhat kini Kanako." Dili hinakog nga kinabuhi, dili sa paghunahuna pag-usab, dili sa paghunahuna mahitungod niini; apan ikaw patay gayud ngadto sa mga butang niining kalibutana, ug buhi gayud diha kang Cristo, ug nagalakaw gayud sa halapad nga dalan, nga kining mga butanga sa walay paghunahuna gibuhat nga butang. Imo lamang gibuhat kini.

43 Karon, ako moingon, "Sa dihang ang Ginoo—ang Ginoo nagpabuhat kanako niana." Dili mao kana. Ikaw bahin lamang Kaniya. Ang Iyang Espiritu anaa sa sulod nimo, ug ikaw milihok sa paagi nga Siya milihok. Buhata kini. "Adunay usa ka dalan nga daw matarung ngadto sa usa ka tawo, apan ang katapusan mao ang dalan sa kamatayon. Dili ang tanan magaingon, Ginoo, Ginoo, makasulod, apan sila nga nagabuhat sa kabubut-on sa Akong Amahan," gikan gayud sa ilang mga kasingkasing, sa kinabubut-on gayud.

Karon, niadtong adlaw sa Kalbaryo gibayran ang bili aron kita mahimo niana nga paagi. Dili moingon, "Nahibalo ka, ang balo nga si Jones usa ka higayon... Siya nahutdan ug oling, ug ako miadto ug gipalitan siya ug oling. Uh, sultian ko kamo, akong nakita ug usa ka igsoon nga nagkinahanglan ug usa ka parisan sa bisti. Dalaygon ang Dios, ako usa ka Cristohanon." Oh, tan-awa, ikaw nga hakog, kabus, makalooloy nga tawo, kamong mga maut. Ayawg ipahibalo ang toong kamot sa ginabuhat sa walang kamot, kon ang walang kamot mahibalo sa ginabuhat sa toong kamot.

Sa wala but-i gayud namatay diha kang Cristo hangtud nga buhaton nimo kini bisan unsaon. Mao kana ang imong kinaiya; mao kana ang imong gawi. Buhaton nimo kini bisan unsaon. Mao kini gayud ang kinabuhi nga nagpuyo sa imong sulod. Ikaw sa hingpit nailalum ngadto nianang Espiritu, ug Kini nagkinabuhi sa Iyang kaugalingon gayud sa sulod nimo.

44 Oh, imong mabati kanang dalayegong Espiritu, kanang kinabuhi, "Dili ako ang nagkinabuhi," miingon si Pablo, "apan sa Cristo ang nagkinabuhi sa sulod nako." Sa wala but-i gayud...

“Buyno, sultian ko ikaw, Brother Branham. Kita mga Cristohanon dinhi. Kami nagatabang niining katawhan. Nagatabang kami kanila nga mga katawhan.” Oh, tan-awa, makauulaw kanimo. Dili kana mao ang Cristiyanismo. Ang Cristiyanismo sa wala but-i gayud ang nagbuhat niini. Ug ikaw wala gayud mahibalo, sa tanan... Moadto sa pagbuhat niini.

Si Cristo sa hingpit nagtugyan sa Iyang Kinabuhi ngadto sa Dios. Iyang gihatag ang Iyang kaugalingon ingon nga publiko nga Sulogoon nga ngadto sa katawhan. Iyang gihatag ang Iyang Kinabuhi sa walay pagpanuko. Dili na kinahanglan buhaton Niya kini. Wala Niya buhata kini pinaagi sa kasina. Wala Siya moingon, “Karon, igsoon, kamong tanan angayng maghunahuna ug daku mahitungod Kanako, tungod kay ako mianhi sa pagpakamatay alang kaninyo.” Wala gayud Siya misulti ug usa ka pulong mahitungod niini. Siya nagpakamatay bisan pa man, tungod kay ang Dios anaa diha Kaniya. Mao kini ang Dios anaa diha kanimo. Mao kini ang Dios anaa dinhi kanako nga makahimo kanako sa pagtan-aw sa uban.

45 Ang mga kanding sa usa ka bahin. Usa kanila moingon, “Buyno, Ginoo, ako nagbuhat niini, ug, Ginoo, ako nagbuhat niana.”

Siya miingon, “Pahawa Kanako, kamong mamumuhat ug dautan, wala ko gayud kamo igkaila.”

Kung ang iglesia makaabut gayud nianang sukaranang mga kamatuoran, dili mao kana ang usa ka butang nga imong gitinguha nga buhaton, imong gihunahuna nga buhaton; usa kini ka butang nga nahimugso diha kanimo.

46 Pasayloa ako, akong mga Pentecostal nga mga higala. Ako usa ka Pentecostal, apan ang akong mga Pentecostal nga mga higala nakaabut sa usa ka dapit diin adunay daghang mga paspas nga musika, magtambol sa mga banda, kon magpalakpak sa mga kamot, kon mga tamborin aron sa paghimo ug pagsinggit. Mga pagbati lamang kana. Sila nagapatugtog ug mga banda sa dili pa sila moadto sa gubat aron ang katawhan mobati alang sa gubat. Ako nagatoo sa musika. Ako nagatoo sa pagpalakpak ug mga kamot, apan ako nagatoo niining mga butanga. Mao kana ang tinuod gayud. Kita angay nga magbaton niana, apan inyong nabiyaan ang dakung butang nga wala nabuhat...?... kanang kaugalingong paghalad sa Kinabuhi nga ang Dios nagpuyo diha kaninyo, sa wala but-i nagbuhat nianang husto, tungod kay kini husto: nagapadayon lamang sa pagbuhat, sa walay paghunahuna gani mahitungod niini, nagkinabuhi gayud niini. Unya bantayi... Tan-awa ninyo unsay mahitabo, inyo lamang—dili kamo—kamo anaa sa dakung dalan. Mao kana kung unsa ang kahulogan sa Kalbaryo kaninyo: diha sa dakung dalan—gibuksan nianang adlaw alang kaninyo.

47 Karon, hinumdomi karon, dili ka mahimo nga katunga kanding ug katunga karnero. Dili sila magsagol. Karon, adunay daghang mga tawo nga moingon, “Oo, nahibalo kamo niana? Kita nakabaton ug usa ka organisasyon sa atong gropo. Kita -kita nagatabang sa mga kabus. Kami nagabuhat niini.” Maayo kana, apan ikaw nagsilbato sa imong kaugalingon torotot mahitungod niini. Dili nimo buhaton kana. Maghatag ka ug limos sa tago; si Jesus miingon. Sa wala gayud hunahuna usa ka butang nga anaa kanimo; dili kini labaw pa kay sa pagkuha ug usa ka mainom nga tubig. Ikaw giuhaw. Kung ang laing tawo giuhaw, ikaw naghunahuna mahitungod usab kaniya. Ang kinahanglan sa laing tawo, ikaw naghunahuna mahitungod kaniya nga sa sama sa imong kaugalingong kinahanglan, ug ayawng pagtagad ngadto niini, pagpadayon lamang sa pagkinabuhi.

48 Karon, dili ka mahimong katunga nga karnero ug katunga nga kanding. Busa kung ikaw moingon, “Buyno, ang atong simbahan adunay organisasyon. Nagahatag kami sa mga kabus. Nagbuhat kami niini, ug nagabuhat niana, ug nagabuhat ug uban.” Kung ikaw nakabaton niana nga wala nianang laing butang, nga mao ang kinabuhi ni Cristo diha kanino, ikaw lamang sa pagkatinuod nagabuhat sa kawang. Si Jesus...

Si Pablo miingon, 1 Mga Taga-Corinto 13. “Kung ako magabahinbahin sa akong mga bahandi ug ipakaon sa mga kabus, ug igatugyan ang akong lawas aron pagasunogon ingon nga halad, wala akoy kapuslanan.” Karon, malisod kini apan mao kini ang kamaruoran. Kinahanglan nga makaabut ka nianang kamatuoran. Ilha kung unsa ang gibuhat sa Kalbaryo alang kanimo.

49 Atong makita kini ug moingon, “Oh, oo maayo kana.” Dili mao kana. Kung kanang Anak sa Dios kinahanglan moadto sa Kalbaryo aron ilansang, ang tanan nga mga anak kinahanglan moadto sa usa ka Kalbaryo. Kinahanglan siya adunay usa ka Kalbaryo. Kinahanglan ikaw adunay nianang adlaw sa Kalbaryo. Kinahanglan makabaton ako nianang adlaw sa Kalbaryo. Mao kana ang maghusay sa suliran sa sala. Dili ang paglamano sa magwawali, dili nga malamano pasulod ngadto sa iglesia, dili makasulod pinaagi sa surat, dili makasulod pinaagi sa propesyon, apan makasulod pinaagi sa pagkahinugso.

Wala gayud Siya maghatag ug usa ka surat. Wala gayud Siya maghatag ug usa ka propesyon. Siya naghatag ug usa ka pagkahimugso. Mao kana kung giunsa nato sa pagtungha. Unya gikan niana sa wala but-i kita nagkinabuhi sa Cristohanong pagkinabuhi.

50 Karon, laing timang... Katunga kanding, katunga karnero, sila walay usa niana ka butang. Dili ka

katunga kanding ug katunga karnero, ikaw kanding kondili karnero. Karon, kung ikaw lamang magabuhat ug maayong mga butang, ug maghunahuna nga ikaw makasulod pinaagi niana, nan walay mahimong usa ka adlaw sa Kalbaryo. Ang kasugoan nagtagana niana. Apan ingon nga kini gikuha ang adlaw sa Kalbaryo nga pasudlon, nga kita dili lamang mahimong membro sa simbahan, apan mahimong mga anak nga lalake ug mga anak nga babaye sa Dios.

Mao kana kung unsa ang adlaw sa Kalbaryo. Mao kana kung unsa ang buot ipasabut kanimo. Mao kana ang angayng buhaton nimo, ug pagasundon, ug molihok sama kang Jesus...

Karon, ang sapa dili moagay pataas ug paubos sa mao gihapon nga higayon. Ang sapa moagay lamang sa usa ka paagi, ug ang Espiritu sa Dios moagay lamang sa usa ka paagi. Dili kini mosagol ug mga butang uban niini, moagay sa mao ra gihapon nga paagi.

51 Tan-awa si Jesus, sa pagtapos. Si Jesus miingon, "Ang mga buhat nga Akong ginabuhat pagabuhaton usab ninyo, kay Ako moadto sa Amahan." Dili kaayo ako magsulti niini sa iglesia dinhi; kamo nakasabut; apan kining mga mensahe gi-teyp. Tinagpulo ka liniboan ang makapatalinghug sa palibot sa kalibutan. Akong tubagon kanang pangutana sa mga kritiko karon dayon.

Makadaghan ako giingnan—gisuginlan, sila miingon, "Ngano, ikaw motoo sa Bibilia?"

Si Jesus miingon, "Kining mga buhat nga Akong gibuhath pagabuhaton usab ninyo, ug labaw pa niini ang inyong pagabuhaton, kay Ako moadto sa Akong Amahan."

52 Unsa ka dautan ang imong nakuha, mister? Unsa ka halayo kaayo gikan sa pag-ila nga mahimo ka nga mahisalaag uban sa inyong inutok nga mga teyolohiya, uban sa inyong salabutanong panghunahuna sa bisan unsang butang? Akong maloyloy-ong ug nawala nga higala, dili ka ba makasabut nga kining Biblia gihubad nga espirituhanon? Si Jesus nagpasalamat sa Amahan nga Iyang gitago kini gikan sa edukado, ug maigmat, makinaadmanon, ug masinabuton, ug magapadayag niini sa mga bata sama nianang moadto sa Kalbaryo.

53 Karon, bantayi, si Jesus miingon... Bantayi giunsa Niya sa pagsulti niini. "Ang mga buhat nga Akong gibuhath (Siya nagabuhat niini karon gayud.)—ang mga buhat nga Akong gibuhath karon, pag-ayo sa masakiton, pagbanhaw sa patay, pagpabuka sa mga mata sa buta, kining mga buhat pagabuhaton usab ninyo. Mabuhat ninyo kini kung motoo kamo Kanako. Magabuhat kamo niining mga buhat, ug unya labaw pa niini ang inyong pagabuhaton, kay Ako moadto sa Amahan. Sa dili madugay ang kalibutan dili na makakita Kanako. Bisan pa niana kamo makakita Kanako. Ako magauban kaninyo, bisan diha kaninyo hangtud sa katapusan sa kalibutan. Dili Ko kamo pagabiyaan nga mga ilo. Magaampo Ako sa Amahan. Siya magapadala kaninyo ug laing Manlalaban, nga mao ang Espiritu Santo, Kinsa ang kalibutan dili makadawat, bisan pa niana kamo makadawat Kaniya."

54 Karon, matikdi, ang labing daku nga mga buhat mao nga makabaton ug gahum diha sa iglesia, dili lamang sa pag-ayo sa masakiton, paghingilin ug mga yawa pinaagi sa pag-ampo, apan sa pagpaambit sa Kinabuhing Dayon ngadto sa mga magtotoo. Ang Espiritu Santo moabut ug ihatag ngadto sa mga kamot sa iglesia aron sa pagpaambit ug kinabuhi. Oh, mao kana ang ipasabut sa Kalbaryo.

Unsa ka labing daku niini sa pagsulti ngadto niining masakitong babaye nga nagahigda dinhi, "Magaampo ako sa usa ka pag-ampo sa pagtoo," ug siya mamaayo. Mao kana ang usa ka dakung butang. Mao kana ang Iyang gibuhath kaniadto, apan miingon, "Labing daku kay niini ang inyong buhaton. Magahatag Ako kaninyo ug gahum, dili lamang sa pagbangon kaniya sa makadiyot, apan hatagan siya ug Kinabuhing Dayon, nga mao ang walay katapusan."

55 Kabus, buta, makalolooyng katawhan, giunsa ninyo sa pagkasipyat niana? Wala ba ninyo makita unsa ang labing dakung butang? Mao kana ang pinakalabing dakung butang nga mahitabo gayud ang pagpaambit sa Kinabuhing Dayon ngadto sa Katawhan.

Unsa ang kinabuhing Dayon? Ang Kinabuhi nga Iyang gikinabuhi, ang Kinabuhi nga anaa diha Kaniya: gipaambit ngadto sa uban. Mahimo ba kana sa tawo? Ang Anak sa Dios makahimo. Si Jesus miingon, "Bisan kinsang mga sala nga inyong pasayloon, kana ginapasaylo kanila. Bisan kinsang mga sala nga inyong gipugngan, kana ginapugngan kanila."

56 Karon, ania dinhi diin ang iglesia Catolica ug daghan sa uban nakahimo sa ilang dakung sayup. Sila mogula ug moingon, "Akong gipasaylo ang imong mga sala." Dili mao kini.

Giunsa nila nga napasaylo ang ilang mga sala diha sa Biblia? Si Pedro mitubag nianang pangutana sa adlaw sa Pentecostes. Sila miingon, "Unsay among buhaton aron maluwas? Unsaon namo pagkakuha niini nga nakuha ninyong tanan?"

Iyang gihatag ang reseta. Iyang gisultian sila unsay buhaton. Siya miingon, "Paghinulsol, ang matag-usa kaninyo ngadto sa Dios, ug magpabautismo sa Ngalan sa Ginoong Jesu-Cristo." Alang sa unsa? "Sa

kapasayloan sa inyong mga sala." Mao kana ang labing dakung mga buhat.

57 Pila kaninyo nga mga magwawali niining kabuntagon, pila kaninyo ang nagapaminaw sa akong pulong diha sa teyp, buot moadto sa Kalbaryo niining kabuntagon ug motan-aw kung unsay gibuhad sa Dios didto alang kaninyo, ug mosalikway sa inyong denominasyonal nga mga kredo, ug mowali sa Maayong Balita? Hallelujah. Anaa kini sa inyong sabakan karon. Unsay inyong pagabuhaton mahitungod niini? Ngano? Ang paghinulsol ug pagpasaylo sa mga sala kinahanglan iwali diha sa Iyang Ngalan ngadto sa tibook kalibutan magsugod sa Jerusalem. Hallelujah, mao kana.

Unsay kahulogan sa Kalbaryo alang kanimo? Unsa ang nabuhad nianang adlaw ngadto kanimo? Nakapasigarbo ba kini kanimo ug ubang teyolohiya? Nakahimo ba kini kanimo nga usa ka mapasigarbohon nga tawo, kon nakahimo ba kini kanimo nga usa ka Cristohanon, nakabig (Hallelujah.) mga sala napasaylo? Labing dakung mga buhat kay niini ang inyong buhaton. Inyong makita kung diin kamo, dili ba? Labing dakung mga buhat kay niini, pagpasaylo sa mga sala diha sa Ngalan ni Jesu-Cristo. Apan pinaagi sa mga kredo, ug mga denominasyon, ug uban pa, kini magagapus kanimo ngadto sa usa ka dapit nga ikaw sa gihapon magalaagad sa kalibutan.

58 Suginli ako ug bisan kinsa nga tawo, suginli ako, bisan kinsang babaye nga makahimo sa pagduol ngadto sa Kalbaryo, ug nagtinguha nga mahimong usa ka dakung tawo tungod kay ang ubang tawo misulti ug usa ka butang. Suginli ako diin ikaw makahimo sa pagtan-aw sa nawong sa Kalbaryo diha sa iyang hustong kahayag, nianang adlaw sa Kalbaryo...

Unsaon nimo sa pagbaton sa imong adlaw sa Kalbaryo ug mogula nga usa ka tawong mapasigarbohon? Giunsa nimo paggula ingon nga usa ka tawotawo alang sa ubang organisasyon kon mowali sa ubang hinimo sa tawo nga doktrina? Nganong wala kini makapaubos kanimo ngadto sa Pulong sa Dios? Kung ikaw nakaadto gayud didto, ikaw mogula nga mapainubsanon. Giunsa nimo nga buot mahimong usa ka dakung usa ka butang diha sa inyong organisasyon uban sa balhibo sa imong kalo, sa dihang si Jesu-Cristo ang Anak sa Dios nagpaubos sa Iyang kaugalingon ngadto sa dinuslak nga lawas ngadto sa giluwang nawong, hangtud ang kaulaw ug pagkatinamay, ug ilang gihukasan Siya ug saput, ug gilansang Siya atubangan sa kalibutan, nagatamay sa kaulawan? Unsaon nimo pag-adto sa Kalbaryo ug mogula nga sa bisan unsang butang lahi kay sa unsa Siya: usa ka tinamay, usa ka makauulaw?

Oh, ikaw moingon, "Palagpoton nila ako." Pasagdi sila nga mopalagpot. Batoni ang imong adlaw sa Kalbaryo. Ang Dios magahatag sa Iyang dalan uban kanimo. Tugoti ako sa pagkutlo niana pag-usab. Batoni ang imong adlaw sa Kalbaryo; ang Dios magahatag sa Iyang dalan uban kanimo. Magaampo kita.

59 Ginoo, O Dios, dal-a kaming tanan ngadto sa Kalbaryo karon dayon. Papahilayoa kami sa among kaugalingon, Ginoo, ang kahadlok sa tawo, ang kahadlok sa isulti ni bisan kinsa pa. Oo, ang tibook kalibutan nagbiaybiay Kaniya, nagyagayaga Kaniya. Apan Siya masinugtanon ngadto sa kamatayon; Siya masinugtanon ngadto sa pagkatinamay. Siya masinugtanon bisan pa sa ilalum sa kapangulohan sa kagamhanan. Kami nakaamgo nga sa dihang si Satanas midagmal niining yuta, siya nahimong punoan ug pagbulot-an dinhi niining yuta. Siya misaksi sa mao gihapon atubangan sa atong Ginoo ug miingon, "Kining mga gingharian akoa. Buhaton ko kanila ang buot ko nga buhaton." Ug kami nakaamgo nga gikan nianang adlaw ngadto dinhi, niining kalibutan, ilalum sa tunglo, giharian sa nagtunglo niini. Apan Dios, O Dios, kami nagaalagad sa usa ka Gingharian nga dili tinunglo.

Amahang Dios, unsa ka kahibulongan kini nga Ikaw nagbuhat ug ubang dagkung mga butang diha sa —diha sa hulagway sa kalibutan karong panahona, nga gitugotan kining dagkung mga hulagway sama sa "Ang Napulo Ka Mga Sugo," ug uban pa, sa pagpagula, aron makakita ang mga lalake ug mga babaye, nga dili gani makangitngit sa pultahan sa simbahan, apan tugoti sila nga makakita kung unsa kini. Ang paagi sa Dios mao ang sinalikway nga paagi sa kalibutan, tungod kay sama kami nga moadto sa Russia ilalum sa Komunismo...

Kami ania dinhi niining kalibutan, apan kami dili iya niining kalibutan. Kami nakaadto na sa Kalbaryo. Among gilansang ang among mga kaugalingon, uban sa gingharian sa Dios, aron mahimong usa sa mga Iya. Bisin kung unsa ang isulti sa kalibutan, among pilion ang dalan uban sa pipila nga ginatamay tungod sa Ginoo. Magapadayon kami ngadto sa pagkabanhaw, ug kami nagatoo nga haduol na kana, Ginoo, ngadto diin kami pagabanhawon ngadto sa usa ka Gingharian nga mobontog niining kalibutan ngadto sa pinong tahap, ug ang hangin mohuyop niini gikan sa giukanan sa ting-adlaw. Apan ang Bukid, ang Bato, mitubo ngadto sa usa ka dakung Bukid nga mitabon sa yuta. Kanang Bato moabut. O Dios, buot kami nga mahimong bahin niini. Among ilimod ang among mga kaugalingon, magadala sa among mga krus sa matag-adlaw, ug magkinabuhi alang kang Cristo, magkinabuhi alang sa uban. Tugoti kini, Ginoo.

60 Kung adunay uban dinhi niining kabuntagon nga wala mahibalo Kaniya ingon nga Manluluwas ug buot mahinumdoman diha sa panghinapos nga pag-ampo, ug buot nga kini mahimong inyong adlaw sa Kalbaryo, mahimo ba nga ipataas ang inyong mga kamot, ug moingon, "Pag-ampo alang kanako, Brother Branham. Buot ako mahibalo kaniya ingon nga akong Manluluwas." Ang Dios magapanalangin kanimo, batan-ong tawo. Adunay uban pa ba? Ang Dios magapanalangin kanimo, akong igsoong lalake, sa luyo

didto. Aduna pa bay lain pa nga mosulti nga, "Buot ako masayud Kaniya. Buot ako nga kini mao ang mahimong akong adlaw sa Kalbaryo. Ako masakiton ug gikapoy. Unsay akong kapuslanan nga sa walay pulos nagalibot dinhi uban sa maong butang nga gipakatawo ako aron sa pagbuhat? Ako natawo, natawo nga mahimong anak sa Dios, ug ania ako nagakupot sa mga butang sa kalibutan. Dios, tugoti ako nga malansang karong adlaw. Tugoti ako sa paglansang sa akong kaugalingon ug ang akong mga ideya, nga ako mahimong mabuhi uban kang Cristo ug magkinabuhi alang sa uban. Bisan pa kung unsay ilang pagabuhaton kanako, ug magbiaybiay kanako, ug maglutos kanako ug mosulti ug tanang dautan batok kanako, ug mga butang, tugoti ako nga sa mapainubsanon magalakaw, maaghop sama sa karnero, sama sa Iyang gibuhat. Sa umalabot nga adlaw Siya nagsaad sa pagbanhaw kanako pag-usab sa katapusang mga adlaw. Nagapaabut ako nianang adlaw."

Aduna pa bay dugang mga kamot nga mopataas? Ang Dios magapanalangin sa luyo didto, ug ikaw. Buyno, dugang pa, nga... Ang Dios magapanalangin kanimo, ang Dios magapanalangin kanimo. Dugang uban pa niana sa dili pa kita moampo...

61 Among langitnong Amahan, gikasulti kini sa dihang si Pedro nagwali sa adlaw sa Pentecostes, "Sa ingon ka daghan nga mitoo ginadugang ngadto sa iglesia." Sila sa tinuoray mitoo sa tibook nilang mga kasingkasing, kining katawhan nga mipataas gayud sa ilang kamot. Ako nagatoo nga sila mitoo sa tibook nilang mga kasingkasing. Ug kung sila mitoo, adunay biawan sa tubig nga nagapaabut dinhi. Buot sila nga kanang mga sala mapasaylo; adunay usa ka tawo dinhi nga makabautismo kanila nianang Ngalan, ug sa Ngalan lamang nga anaa sa ilalum sa langit nga gikahatag sa mga tawo, nga kita maluwas. Kay akong gikutlo ang Kasulatan pipila ka mga gutlo ang milabay, nga ang paghinulsol ug pagpasaylo sa sala kinahanglan iwali diha sa Iyang Ngalan ngadto sa tibook kalibutan, magsugod sa Jerusalem... Ug sa Jerusalem, sa diha nga ang paghinulsol ug pagpasaylo sa sala giwali ang apostol nagsugilon kanila sa Mga Kasulatan ug miingon nga sila kinahanglan maghinulsol pag-una ug unya magpabautismo sa Ngalan ni Jesu-Cristo. Mao kana ang bulohaton sa magwawali. Alang kanila sa paghinulsol, ug kaniya sa pagbautismo kanila alang sa kapasayloan sa ilang mga sala, "Bisan kinsa nga sala nga inyong pasayloon, kana ginapasaylo kanila. Bisan kinsa nga sala nga inyong pugngan, kana ginapugngan kanila."

62 Amahan, unsaon gayud sa kalibutan sa pagkaikyas gikan sa pagkasapoton sama sa ilang nabatnan? Nganong dili motoo sa yanong Maayong Balita? Ug bisan pa gani ilang gipasulod kana aron ipuli ang mini nga mga ngalan, mini nga mga bautismo, mini nga bautismo sa Espiritu Santo, paglamano sa mga kamot sa mga ministro, sa paggamit sa mga titulo sa Amahan, Anak, Espiritu Santo nga wala gayud diha sa Mga Kasulatan, usa ka dokumento nga gibuhat sa mga tawong Romanhon, dili usa ka Cristohanong pagpanudlo nga dili makaplagan sa Biblia. Ang pagpasaylo sa mga sala dili mapasaylo pinaagi sa mga titulo, apan pinaagi sa Ngalan ni Jesu-Cristo.

Karon, Amahan, kami nahibalo nga kini dili inila. Ang Imong mga paagi sa kanunay mao kana nga paagi; apan tugoti ang mga lalake ug mga babaye niining kabuntagon makaabut nianang adlaw, nianang adlaw sa Kalbaryo, diin si Jesus nagtamay niana nga adlaw, nianang kaulaw nga gihuboan, nga gitigbas ngadto sa mga tipik, nga maluwaan, ug biaybiayon sa tibook kalibutan, pinaagi sa iglesia, pinaagi sa katawhan nga mahigugma unta Kaniya; apan bisan pa nianang tanan, wala Niya gibuka ang Iyang baba ug nagpakamatay alang niadtong katawhan nga nagbiaybiay Kaniya.

63 Dios, dal-a kami ngadto sa Kalbaryo niining kabuntagon, ug kung sila moingon nga kami nabuang, sila moingon nga among nakuha ang Mga Kasulatan sa sayup nga paagi, bisan unsay ilang gusto isulti, Dios, sila dili makabarug diha sa Presensya sa Dios ug mosulti niini nga sayup.

Dili sila makatabon sa ilang mga sala pinaagi sa Biblia. Ang Biblia nagpadayag sa ilang mga sala, ang ilang pagkadili matinoohon nga nahimong inila nga buhaton sama sa ubang katawhan. Tugoti sila nga moduol sa Kalbaryo niining kabuntagon ug magsugod sa Jerusalem, nga ang paghinulsol ug pagpasaylo sa mga sala kinahanglan iwali diha sa Iyang Ngalan ngadto sa tibook kanasuran magsugod sa Jerusalem. Tugoti sila nga makabaton nianang mao gihapon nga lakang sa paglansang ngadto sa pagdughang, ug pagaluwaan, pagbiaybiayon, ug tawgon sa tanang butang nga mahimong itawag sa mga relihiyosong mga mabudhion, nagapangguba sa mga simbahan, tanan nga ilang buot nga itawag.

Hinaut kami, Ginoo, niining kabuntagon magpili sa among dalan uban sa pipila nga ginatanay tungod sa Ginoo. Hinaut nga kami magalakaw sama sa gibuhat sa mga apostoles, nga wala moliso sa too ni sa wala, ug gikan sa pagkamaayo sa among mga kasingkasing nga moalagad sa Dios. Tugoti kini, Amahan.

Karon, ayoha ang mga masakiton ug ang nagaantus nga moanhi sa linya sa pag-ampo. Hinaut kining mipataas sa ilang mga kamot, diha sa ilang mga kasingkasing maghinulsol karon dayon. Hinaut nga sila nga mitindog sa dugay kaayo nga panahon, sa madali moadto sa tubig ug ang ilang mga sala mapasaylo sa Ngalan sa halad, si Jesu-Cristo ang Anak sa Dios. Amen.



[www.messagehub.info](http://www.messagehub.info)

Mga Wali Ni  
**William Marrion Branham**  
"... sa mga adlaw sa tingog ..." Pin. 10:7